

Minister Michelle Hooyboer-Winklaar ta considera esaki un otro logro pa e hende muhe

Cambio den Kiesverordening ta elimina distincion entre genero riba carchi di voto

ORANJESTAD (AAN): Den cuadro di e maneho di Minister di Asuntonan Economico, Asuntonan Social y Cultura, Michelle Hooyboer-Winklaar, siguiientemente Parlamento lo atende algun cambio den articulo 7 y 8 di e Kiesverordening di Aruba, unda cu ta modernisa e articulon y elimina e distincion entre genero (sexo).

Esaki ta basa riba e principio cu no mester tin discriminacion, o sea diferencia, den e forma di adresa un persona basa riba e hecho cu si e ta hende muhe of hende homber.

“E articulonnan antes no tabata duna e posibilidad pa uza fam di e hende muhe; esaki no tabata refleha un sociedad moderno,” asina Minister Hooyboer-Winklaar a splica. E articulonnan bieu ta identifica e hende muhe pa medio di e fam di su casa, sigui pa e palabra “geb.” of “geboren” (naci), sigui pa e fam di soltera.



Esaki ta aplicabel tanto pa hende muhe casa, como hende muhenan viuda.

Den e concepto di ley nobo, cual no a worde aplica pa e eleccion aki ainda, esaki ta worde adapta y a elimina e situacion unda cu e fam casa ta bay prome. Segun e articulonnan renoba, cu lo uza e fam cu e hende muhe tin inscribi na Censo. Si eynan e ta uza su fam di soltera, anto esey lo bay riba su carchi di voto. Si pa casualidad e ta uza e fam di casa so, esey lo bay riba

su carchi. Tur cos ta depende con e ciudadano a inscribi su mes na Censo, cu ta un decision propio.

Minister Michelle Hooyboer-Winklaar ta contento cu e cambio aki ta na caminda y ta spera cu pronto lo trat'e den Parlamento. Mas cu un derecho, e ta mira esaki como un otro logro pa e hende muhe. Cu no necesariamente mester ta mara na un fam di casa, siendo nan tin nan propio identidad.